

Վ Ա Ն Տ Ո Ս Պ *)

II

Վան-Տոսպ գաւառի, որպէս և Վանայ վիլայէթի կուսակալանիստ կենտրոնն է Վանը, 38⁰,30 «հիւս. լայնութեան և 43⁰,18» արևելեան երկարութեան տակ: Հին Տուշպան **). հին, նախնի բնիկների, որպէս և տեղական—վանեան արձանագրութիւնների Բիայնան ***). (biaina), որպէս և Շամիրամակերտ, որ ըստ հայկական աւանդութեան****) նորոգուելով ինչ որ Վան թագաւորից, Մեծն-Ալէքսանդրի ժամանակակից IV դարում, ստանում է նրանից իր անունան վերջնական ձևակերպութիւնը: Վանը, արևելքի ամենագեղեցիկ դրախտներից մէկը, գլխաւորը, արժանի է ամբողջովին այն թիւրքական առածին, որ ասում է. «դիւնիադա Վան, ախիրէթդէ իման» (Վանը այս աշխարհումս, իսկ հանդերձեւումս՝ դրախտը): Տարածւում է ծովի արևելեան ափի վրայ նրանից 2 անգլ. մղոն (3 վերստ) հեռավորութեամբ Վանայ ընդարձակ և տափարակ դաշտի մէջ տեղում, գեղեցիկ դիրքով և լայնածաւալ նստուածքով:

Քաղաքը բաժանւում է երկու գլխաւոր մասերի, որոնցից

*) Տես «Մուրճ» № 6:

**) Ինչպէս անուանում է ճշտութեամբ Պողոմէոս՝ «Θωπινα». Աշխարհագր. V-13 Pr. 7, 19, և մեր Խորենացին. III-35:

***) Բիայնա ինչպէս երևում է՝ Տոսպիտի մայրաքաղաքի տոհմային տնունն է, ըստ որում այդ յորջորջումը գտնում ենք միայն վանեան, այսպէս կոչւած՝ հին-հայկական արձանագրութիւնների մէջ, իսկ Ասորական քեռագիրների մէջ դրա փոխարէն գտնում ենք «մայրաքաղաք Ուրարտուի», որ փոխադարձաբար վանեան արձանագրութիւնների մէջ բնաւ չի գտնւում. հետաքրքիրն այն է, որ Վան քաղաքի հին Տուշպա անունը այժմ անցել է ամբողջ գաւառին, և գաւառի հին անունը՝ Իբան-Վանը այժմ քաղաքին է տրւում, ինչպէս նկատել է A. H. Sayce.

****) Մովս. Խոր. I-ԼԱ.

Իւրաքանչիւրը տարածւում է մի-մի քարաժայռերի ստորոտ: Բոլորն քաղաքի, որին կարելի է Բերդաքաղաք էլ անուանել, հիւսիսակողմը դաշտից ուղղաձիգ բարձրանում է մի քարաժայռ որձաքարից, Վանայ հուշակաւոր բերդը, նրա ամրոցը կամ միջնաբերդը 100 մետր բարձրութեամբ և 1650 մետր երկարութեամբ արևելքից արևմուտք երկարութեամբ: Քարաժայռ հարաւից բոլորովին անմատչելի է և ահաւոր, իսկ հիւսիսից թոյլ պարիսպներով ամրացած որպէս թէ: Բերդին մէջ, ուր բարձրանում են արևմտ. կողմից քարէ սանդուխներով, կան բազմաթիւ քարէ արուեստական աստիճաններ, 7—8 հատ զանազան մեծութեամբ թէ բնական և թէ յատկապէս փորուած քարայրներ, զալերէսներ, նեղ անցքեր, որոնք պատկանում են Ուրարտայոց ժամանակներին, մասնաւորապէս նրանց Արգիստիս I. հօր, շինարար և աշխարհակալ արքային (780—755 Ն. Ք.), որպէս ցոյց են տալիս բերդի արտաքին որմերի վրայ մինչև այսօր էլ մնացած սկաւաձև արձանագրութիւնները: Այժմ կան նոյնպէս թիւրք զօրքերի մի պահականոց, մի հին եկեղեցի և Բարդուղիմէոսի անուանով, այժմ մզկիթի փոխուած, և մի մթերանոց (դարօ): Այս քարաժայռի վրայ դանդաղ բազմաթիւ բնեռադիր արձանագրութիւններից աչքի է ընկնում մասնաւորապէս մէկը բերդին հարաւային լերի երեսում, գետնից մօտ 50 մետր անմատչելի բարձրութեան վրայ քանդակուած *), երեք տախտակներով, իւրաքանչիւրը 27 տող, եռալեզուեան է (պարսկալ. բաբելոնալ. եւրամական), որպէս Պրահիդոնի յայտնի արձանագրութիւն, և նրա նման վերաբերում է Դարեսի որդի Քսերքսեսին (V-րդ դարում Ն. Ք.) և նրա գործերին:

Բերդը իբրև բնական պատուար պաշտպանում է Բէրդաքաղաքը հիւսիսային ձմեռուայ սառնամանիքից. իսկ ընդհակառակն ամառնային արևից տաքացած այդ վիթխարի քարէ զանգուածը սփռում է իր սնտանիւնի ջեռուցիչ ջերմութիւնը քաղաքի վրայ ամբողջ այդ եղանակի տեղութեան միջոցին:

*) Թէ ինչպէս է գրուել գետնից այդպիսի ահաւոր բարձրութեան վրայ եղող արձանագրութիւնը—այդ մասին զանազան հաւանական և անհաւանական ենթադրութիւններ կան. իսկ ինչ վերաբերում է դրա ընթերցման, դրա համար հարկաւոր է անշուշտ բարձրանալ Բերդաքաղաքի մերձակայ մզկիթների աշտարակներից մէկի վրայ և նայել հեռադիտակով, որպէս արել է առաջին անգամ գերման գիտնակ. երիտասարդ Էդ. Զուլց, որ Վանայ արևելակողմ Սալախանէ գիւղի մօտ գտնուող «Աշրատ Դարկա» կոչուած արձանագրութեան հետազոտութեան շարունակած միջոցին սպանւում է հուլիսի 1-ին զաւառի քրորդ ցեղապետից (1829 թ.): Քիչ մնաց, որ նոյն վիճակին ենթարկուէր մի քանի տարի առաջ (1898-ին) գիտնակ. Բէլկ. Սիփան լերան ստորոտներ:

Ռազմական մեծ կարևորութիւն ունեցող այդ բնական ամրոցի հարաւային անմիջական ստորոտը տարածւում է Բերդաքաղաքը, որ քաղաքամէջ էլ է կոչւում, չրջապատուած է կրկնակի ժանիքածն հողէ պարիսպներով, և բազմաթիւ աշտարակներով. այս պարիսպները, որոնք իրանց ներկայ կիսաւեր վիճակով մասամբ կորցրել են իրանց ռազմական նշանակութիւնը, արևելեան, հարաւ. և արևմտեան կողմից չրջապատելով քաղաքը միանում են Բերդի արևելեան և արևմտ. ծայրերին: Պարիսպները արտաքին կողմից չրջապատուած են խրամներով՝ փորուած 1678 թ. թիւրք Օսման փաշայի օրով, թշնամիներից պաշտպանուելու համար:

Բերդաքաղաքը ունի 3 գլխաւոր դռներ—Արևելեանն կոչւում է Թաւրէզ Գալու (դուռ), հարաւայինն՝ Օրթա Գալու, արևմտեանն՝ Իսկալի Դարկախ (նաւահանգիստի դուռ), Աւանց նաւահանգստի կողմն ընկած լինելու համար:

Բերդաքաղաքումն է թիւրք կառավարութեան վալիի (նահանգապետ) պաշտօնատեղին—սարայն և գլխաւոր չէնքերը, մի ընդարձակ զլա (գօրանոց), ջէոպախանէ (մթերանոց զէնքի ևայն), ամբարներ, բաղնիքներ, ջամիներ (moschée), որոնց մի քանիսը մինարէթներ ունին արաբական տիրապետութեան ժամանակներից մնացած, ոմանք էլ քաջքայուած, և հայկական մի մեծ բազար—պարսկակ. բազարների նման, օր. Ուրմիոյ, Հին-Նախիջևանի շուկաները— 2000-ից աւելի կրպակներով, և 500-ից աւելի բնակութեան տներ, որոնք հայերին են պատկանում և բաց առեալ թիւրքերի բնակութիւններից. Բերդաքաղաքում հայերը ունին եօթն եկեղեցիներ իրանց սեփական քահանայական դասով. 1) ս. Նշան կամ Էջմիածին կենտրոնական տաճարն է, ուր պահուում է 1717 թւականից ի վեր Վարագայ ս. Նշանը Հոփսիմէի կրծքի խաչափայտը համարուած. այս եկեղեցուն կից է հայոց առաջնորդարանը, խարիսու և անկերպարան մի շինութեան մէջ*): 2) Տիրամէր եկեղ. ունի տղայոց ուսումնարան, 3) ս. Պօղոս եկեղեցի, 4) ս. Վարդան*) եկեղեցի, 5) ս. Ծիրանաւոր, 6) ս. Սահակ, 7) ս. Ստեփաննոս**) եկեցիներ:

Բերդաքաղաքի տները շատ փոքր են և անկարգ, կարծես

*) Այժմ մի նոր առաջնորդարան շինելու ջանքերի մէջ են վանեցիք:

*) Բերդի ճիշտ ստորոտում մի փոքր և զեղեցիկ եկեղեցի է յանուն քաջին Վարդանայ Մամիկոնեանի, նորոգուել է մի քանի անգամներ 1659 թ. ձեռամբ Խօջա-Ամիրին քարաշար, և 1744-ին Կարասէֆէրենց նշանաւոր տնից Ախիշան աղի ձեռամբ:

**) Նորոգուել է 1710-ին Խոջա-Վարդանի ձեռամբ:

միմիանց վրայ ընկած, չատ քիչերը միայն ունին փոքրիկ պարտեզիկներ մի քանի փոքրիկ ածուներով (մարգ): Փողոցները չափազանց նեղլիկ են, այնպէս որ ձմեռ ժամանակ տների տանիքներից թափուած ձններից գոյացած բլրակների վրայից պիտի պարտաւորուի մարդս ընթանալ փողոցով անցնելիս: Բերդաքաղաքի արեւմտակողմը բերդի անմիջական ստորոտը միայն գտնուում է մի մեծ այգի պողատու ծառաստաններով և բուսականութեամբ ծածկուած Խորխոռ անունով, որը ոռոգւում է բերդի տակից բլխող բաւականին յորդառատ մի աղբիւրով: Բացի սրանից Բերդաքաղաքում կան ուրիշ աղբերակներ էլ, որոնք ինչպէս և 3—4 տաճկ. արշին միայն խորութիւն ունեցող ջրհորի ջրերը անհամ են և լեղի, գուցէ ծովակի մերձաւորութեան պատճառաւ:

Բուն քաղաքի, կամ որպէս անուանեցինք՝ Բերդաքաղաքի ճիշտ արեւելակողմը, միայն կէս մղոն ($\frac{3}{4}$ կերստ) երկարութեամբ հայկական մի հին գերեզմանոցով բաժանուած՝ տարածւում է Այգեստան կամ էգէստար ըստ տեղացոյ (թիւրք. Բաղլար), Վան քաղաքի ամենամեծ և ընդարձակ մասը, որ պարիսպներ չ'ունի սակայն: Դաղաքի այս մասումն է գտնուում 5000 տները Վանի բնակչութեան՝ թէ հայ և թէ թիւրք. նրանցից իւրաքանչիւրը ունի մի մեծ այգի խաղողի «թփերով» և պողատու ծառերով, որոնց թիւը 3000-ից անց է: Բացի տըներին կից եղող այգիներից Այգեստանի արեւելեան ծայրում չինութիւններից հեռու կայ «Նորատունկներ» կոչուած խաղողի և ուրիշ պողատու այգիների մի ընդարձակ շարք իւր քեչկով (հնձան), ուր ապրում են պահապանները միայն կամ քաղաքացիք ամրան ժամանակ:

Այգեստանի տները, բաղդատմամբ Բերդաքաղաքի տների, են ընդարձակ, վայելուչ և բնակութեան յարմարաւոր մի քանի յարկերով և պատշգամբներով, չը նայած, որ քարը հազւագիւտ լինելու համար շէնքերը չինւում են հում աղիւններէ:

Այգեստանը եռանկիւնի ձև ունի, արեւելեան ամենագեղեցիկ և ընդարձակ մասը բռնել են հայերը իրանց այգիներով, իսկ արեւմտեանն՝ թուրք ազգաբնակութիւնն, ի բաց առեւալ Հայկավանք թաղը, ուր հայերը ունին մի հին քարաշէն եկեղեցի Հայկավանից ս. Աստուածածին*) անունով: Այգեստանի մնացած հայաբնակ թաղերը բաժանւում են չորս գլխաւոր մա-

*) Հայկավանուց եկեղեցւոյ նորոգութիւնը յիշոււմ է 1739 թ. Աղթամարի նիկսղայոս կաթողիկոսի ձեռքով, վանեցի Տէվկանց նշանաւոր Յարութիւն քահանայի ժողովարարութեամբ:

սերի չորս եկեղեցիների համեմատ, որոնք 40-50 տարիներ առաջ փոքրիկ մատուռներ են եղել կամ տաղաւարիկներ, ինչպէս յորջորջում էին տեղացիք, և որոնք ապա ժողովրդի տակաւ բազմամարդութեան պատճառաւ ընդարձակուել են և նորոգուել են ըստ կարգին: Դրանցից ամենազլխաւոր և կենտրոնական թաղի եկեղեցին է 1) Նորաշէնու եկեղեցին յանուն ս. Աստուածածնի հիմնարկուած անցեալ դարու 40-ական թւականների վերջերին Աճէմ-Խաչօհնց աղնական տոհմից Սարգիս աղայի և ոմն Նիկողայոս հէքիմբաշու (բժշկապետ) ջանքերով: Եկեղեցին 600-ից աւելի ծուխ ունի. աչքի ընկնող հարուստ կալուածներ և եկամուտի առատ աղբիւրներ չ'ունի թէև, բայց իր ծուխերի առատածեռն նուէրներով և եկեղեցական տուբքերով կարողանում է պահպանել իր պայծառութիւնը, որպէս և իր ծոցին մէջ դանդաղ ծխական վարժարանը, որ միշտ բարեկարգ է եղել և պիտանի:

2) Արարք ընդարձակ և փառաւոր եկեղեցին յանուն ս. Աստուածածնի, Այգեհատանի հարաւային ծայրում. նորոգութիւնը յիշատակում է մի քանի անգամներով, առաջին անգամ 1646 թ. Աւանցի Կիրակոս չինարար եպիսկոպոսի ձեռքով, որ միանգամայն և վարագայ վանքի վանահայր է եղել. Կիրակոսը իր բազմաթիւ չինութիւնները կատարում է Տիրատուր կոչուած հմուտ մի ճարտարապետի ձեռքով, որ Վանայ Տրդատ ճարտարապետն է համարւում: Ապա 1763-ին թ. ապա 1806-ին. և վերջին անգամ հորովանցի Մելիքեան Պողոս եպիսկոպոսի ձեռամբ 1884 թ. կիսով չափ քարից և մնացեալ անթուրծ աղբիւսից: Արարք եկեղեցին ունի 900-ից աւելի ծուխ, որոնք եկեղեցւոյն շուրջն են բնակւում: Իրան է պատկանում եկեղեցւոյն կից հիւսիսային ընդարձակ հրապարակի վրայ, որ կիւրակէ օրերում Վան քաղաքի տօնավաճառի դեր էլ է կատարում՝—100-ից աւելի խանութները, փուռեր և ձիթահան, որոնք բերում են մօտաւորապէս 300 օսմ. լիւրայի եկամուտ, որով զխաւորաբար պահւում է իր ծխական վարժարանը մի փառաւոր երկյարկանի չինութեան մէջ:

3) Յանկոյսների եկեղեցին, պստիկ տաճար Աստուածածին կոչուած, քաղաքի հիււ. արևելեան ծայրում, մի գեղեցիկ ձորակի, որի միջով խիտ տնկուած ծառերի արանքից անցնում է Յանկոյսների գետը, հիւսիսային ափին վրայ չինուած, տանն դարեան հնութիւնով: Յանկոյսներու տաճարը որ երբեմն վանք է եղել, և որի չինութեան պատճառը աւանդութիւնն համարում է VII-րդ դարում ինչ-որ ճգնաւորի տեսած տաճաներկութեան ղէն սխներից մէկի իր վրայ իջնելը, նորոգուել է 1762 թ.:

Քաղաքի ընդարձակուելով և ծուխերի բազմանալով կարիք է զգացւում մեծացնելու, և այդ գործին ձեռնարկողն է լինում նոյն եկեղեցու ծուխերից Թէրլէմէզեան նշանաւոր տոհմից Մհ. Ալիսա աղակոչուածը, որ 1849 թ. մեծացնում է եկեղեցու յաւելումը հողէ մասը և նորոգում. 1896 թ. աւերումները ջնջում են բոլորովին Ալիսա աղայի յիշատակները, որի փոխարէն նոյն եկեղեցու բարեպաշտ Թաղեյիք կառուցանում են այս մի քանի տարուայ ընթացքում մի հոյակապ քարաշար եկեղեցի լաւ ճարտարապետութեամբ, սրա հետ միասին մոխրներէ միջից վերականգնում է և նրա վարժարանը:

4) Ս. Յակոբ եկեղեցին, յանուն Մծբնայի Յակոբ հայրապետի, քաղաքի հիւս. ծայրում Թիւրքաբնակ Թաղերով շրջապատուած, երեք տարի առաջ նորոգուեցաւ հիմքից, Յանկոյսների եկեղեցու վիճակին ենթարկուած լինելուն համար: Ունի իր խզճուկ ուսումնարանը:

Որպէս բուն քաղաքի, Բերդաքաղաքի, նմանապէս և Այդեատանի հիւսիսակողմ Յանկոյսներ եկեղեցու անմիջական հիւսիսակողմ ձգւում է արեւելքից արեւմուտք երկարութեամբ կըրքարից մի հսկայ քարաժայռ, Թոփրազ-Գայէ (հողաբերդ) կամ Զմրւմ-Մաղարա կոչուած, որ իր բարձրութիւնով, բնական և արուեստական մեծ և փոքր քարայրներով, խոշոր անսովոր մեծութեամբ աղիւսներից շարուած շինութեանց որմերի մնացորդներով, 40—50 աստիճան ունեցող, շատ անգամ էլ անվերջ՝ դէպի անդունդը տանող քարեայ արուեստական սանդուխներով, *) հսկայ քառակուսի տաշուած քարերից շինուած աւաղանաձև կազմածներով մնացել է միշտ և կը մնայ մի խորհրդաւոր և ապշեցուցիչ հնութիւն, վանեցու, հետաքրքիր այցելուի և գիտնական հնախոյզի համար իսկ:

Անցեալ դարու սկզբից մինչև այժմ էլ այդ հինաւուրց ամրոցը ունեցել է իր բազմաթիւ խուզարկողները, նրա բազմադարեան խաղաղութեան վերջին վրդովողը եղել են դերման Բէլի և Լէման գիտնականները որոնք իրանց խուզարկութեանց արդիւնքը սկսել են պարբերաբար հրատարակել Գերմանիայում **): Բազմաթիւ խուզարկութիւնների ժամանակ գտւում են

*) Չանաղան առասպելներ են պատմում վանեցիք այն ստորերկրեայ աշխարհների մասին, ուր առաջնորդում են այդ սանդուխները—այդտեղ, այդ խաւար տարածքում միջով անցնում է ինչ որ Գայլ գետը, որի ափն պտտւում է Չարի-Ֆալակը—աշխարհի սնիւր, որ երկրագնդի ճակատագիրն է որոշում:

**) Beiträge zur alten Geographie und Geschichte Vorderasiens von Dr. Waldemar Belk. Leipzig 1901. Heft I. II. և հանդէս Ամսորիայ... №№ 7—11 Թարգմանութիւն Von der Deutschen Armenischen Expedition, W. Z. K. M. XIV, 1900. № 1—2; 5. 1—4. G. H. Lehmann:

եկել հողի տակից հսկայ կարասներ, մի առանձին տեսակի լաւ չինուած և թրձուած, փարչեր, հողէ ամաններ, բրոնզից կուռքեր, վահաններ արձանագրութիւններով, ժանգոտած նետերի բեկորներ, նիզակներ, հին փողեր, գլխաւորաբար Ուրարտեան հարստութեան ժամանակներից մնացած:

Տեղացի ժողովուրդը խօսում է ինչ-որ ստորերկերայ գաղտնի անցքի մասին որ յարաբերութեան մէջ է դնում Թուրազ-Գալէն Վանայ միջնաբերդի հետ, որ նրանից մի ժամուայ հեռաւորութիւն ունի, մօտ 4 մղոն (6 վերստ). այս բանի հաւանականութեան մի քանի նշաններ են երևում:

Թուրազ-Գալէի շարունակութեան վրայ դէպի արեւմուտք գտնւում է Սիւ-քուայ կոչուած քարաբլուրը որին կից Ակոփի կոչուած թրքաբնակ թաղին, ուր կայ մի հրաշագործ մատուռ յանուն ս. Աստուածածնի՝ հիւսիսակողմը մի քարաժայռի կրծքի վրայ 3—4 աստիճաններով ընկած կայ մի հսկայ կեղծ դուռ Մհերի-դուռ կոչուած. բարձրութիւնը 5 և լայնութիւնը 2 մէտր. երկու կողմերը կան նստարաններ. չրջապատող աստիճանների լայնութիւնը է 25—30 սանտիմ. դուռը ծածկուած է բետոնաձև արձանագրութիւններով կրկնագիր տեսակից (en double), թէև մի քանի տեղ եղծուած՝ դիտմամբ տրուած մուրճի հարուածներով. պատմում է վանեան հին թագաւորներից Ռուզաս I-ի (730—714 Ն. Ք.) Խալդիս (Անահիտ ?) դիցուհուն աւրած զոհաբերութիւնների մասին, որ ընդհանրապէս հանդիսանում է մի թանգազին աղբիւր խալդեանց կրօնի պանթէոնի ուսումնասիրութեան համար: Մհերի՝ այս խորհրդաւոր կեղծ դրան մասին ժողովուրդը պատմում է զանազան աւանդութիւններ իրանց վարիանտներով. հետաքրքիր է որ տարուան մէջ մի անգամ, համբարձման տօնի գիշերը կը բացուի ինքնիրան և ներկայ եղող և ներս մտնող բաղդաւորին կը տայ ցանկացածը *):

Ամենից բազմամարդ և գլխաւոր գիւղն է Աւանց նաւահանգիստը ծովի արևելեան ափի վրայ քաղաքից 2 մղոն հեռաւորութեամբ, գեղեցիկ դիրքով և ծառազարդ հայաբնակ գիւղ է, ունի մօտ 500 տուն բնակչութիւն, որոյ մի մեծ մասը կաղմում են մերձակայ գաւառներից մասնաւորապէս Մոկսի Ողիմ կո-

*) Ելդ մասին եղած ժողովրդի մէջ մի զրոյց պատմում է որ մի հովիւ բազդ է ունենում դրան բացուած ժամանակ մէջը մտնել և իր ցանկացած թանկագին իրեղէնները ոսկի և աղամանդ հաւաքել և դուրս գալ. սակայն այդ երջանիկ մահկանացուն երբ իր հովական գաւազանը ներս թողած լինելու համար կը վերադառնայ բերելու, ժամանակը լրացած լինելով դուռը կը փակուի լոնդճի վրայ, որից յետոյ լսում է միայն նրա աղիողորմ ձայնի հառաչանքները:

չուած գիւղի գաղթական բնակիչները, որոնք անցեալ դարում ապաստանել են այստեղ քիւրդական անասնձ հարստահարութիւններից փախչելով: Գիւղն ունէր մի եկեղեցի յանուն ս. Յովհաննէսի շինուած ոմն Աղաւեսան Մարտիրոսի ձեռամբ, որ մի դար մօտաւորապէս առաջ կուէ գնացել ածող ծովակի մակընթացութեան. այժմեան եկեղեցին (դարձեալ ս. Յովհաննէս) ծովի ափից բաւական հեռաւորութիւն ունի: Գիւղը պահուած է մի աղքատիկ նախակրթարան, որ կառավարուած է ս. Յովհաննէս եկեղեցւոյ հասոյթներով, որոնց զլիւսւորն է նաւերի վրայ շինութեանց առթիւ ստացած տրոյ մի որոշ գումար:

Բնակիչների վարք ու բարքը նախանձելի աստիճանի վերայ չէ գտնուած, հաշակուած են նոյնպէս հայհոյելու չնորհքով, որպէս աշտարակեցիք Կովկասում:

Լէզլի.—գտնուած է Աւանց նաւահանգստից 8 մղոն հեռաւորութեամբ դէպի հիւս. մի բլրակի լանջերի վրայ ծովահայկայ հրաշալի գերբով, ունենալով իր առաջ Վան-Տոսպի ընդարձակ դաշտը իր գիւղերով և գեղեցիկ տեսարանով: Բնակիչների մեծ մասը հայ են (մօտ 180 տուն) աղքատ վիճակով, որոնք ունին մի փոքրիկ եկեղեցի յանուն ս. Աստուածածնի: Գիւղի մէջ տեղում ցցուած կայ մի բնական քարածայռ. իսկ Լէզլի բլրակի գագաթին գտնուած է մի փոքրիկ մատուռ Ամենափրկիչ անունով, առ որ ուխտ են գնում—«Կարմիր-Կիւրակէին»՝ երրորդ կիւրակին Զատիկից յետոյ—չրջակայ գիւղերի, նոյնիսկ քաղաքի բնակիչներից մեծ բազմութիւնով: Ըստ տեղական աւանդութեան Ամենափրկիչ տեղում հին ժամանակ եղել է կըռօց մահեան, գուցէ Աղէզ կուռքերի *):

Շաղըաղի.—ընկնում է Լէզլի հիւս. արեւելակողմ դէպի Արձակ տանող կարաւանի ճանապարհի վրայ գեղեցիկ գերբով և ընդարձակ այգիներով. բնակչութեան մեծամասնութիւնը հայեր են (200 տուն). թիւքերը շատ չնչին տոկոս են կազմում Շաղըաղու աղգաբնակութեան: Հայերը գիւղում մի եկեղեցի ունին, կառուցուած XVII-րդ դարու կէսերին: Հետաքրքիրն այն է այս գիւղի համար որ մի ժամանակից ի վեր լոյս աշխարհ է ընկել մի թիւք չէյի, որ բնակուած է Վանայ բերդին հիւս. ստորոտ Շահրաղուց մէկ ժամուայ ճանապարհ հեռի. այդ գիծ մոլլան Շաղըաղի=Շէյի-բաղի (չէյիսի այգի) ստուգաբանելով՝ բնութեան ոյժով կամենում է այդ գիւղի հայ բնակիչներին պատկանող կալուածները գրաւել և ժամանակի

*) Մ. Խոր. I—ԺԵ.

հանդամանքներից և տիրող կառավարութեան իր համար նըպաստաւոր արամադրութիւնից երես առած՝ դատարանի է դիմել իր յիմար ապօրինի գրաւումները վաւերացնելու համար։ Ապուշ պէտք է լինել այժմուանից գուշակել չը կարողանալու համար որ Օսմանեան արդարադատ կառավարութեան նոյնքան արդարադատ դատարանը նրա երկակայական պահանջն և իրաւունքները կը ձանաչի չուտով։

Սղգա.—Թոփրագ-Գալէի արեւելեան ստորոտ թէտլէմէ-զի-փոս կոչուած մի գեղեցիկ ծառաշատ ձորակի, որի միջով անցնում է մի յորդ ջուր, որ պտտեցնում է մի քանի ջրաղացներ՝ երկու ամիսների վրայ տարածւում է Սղգա հայաբակ գիւղը, 100 տուն բնակիչներով և մի կոկիկ եկեղեցով որ անցեալ տարի վերաշինուեցաւ. Սղգայում այգիներ քիչ կան։

Շուշանց.—Ընկնում է Շուշանից լեռան արևմտեան ըստորոտ՝ Թեղի կոչուած ձորակին բերանը. այս զուտ հայաբնակ գիւղը կոչւում է ըստ աւանդութեան Արծրունեաց Սենեքերիմ թագաւորի Շուշանիկ աղջկայ անունով, ուր է և իր գերեզմանը. բնակարանները շինուած են բերդի տեսք ունեցող մի քարածալոյ ստորոտում. Շուշանց գիւղը ունի ընդարձակ հորիզոն. նրա առաջ փռուած է ծովը իր ամբողջութեամբ և վանայ դաշտը Վան քաղաքի և այգեստանների հրաշալի տեսարանով։ Ունի մի հին եկեղեցի յանուն ս. Գէորգի, որի վերջնական նորոգութիւնը եղել է XVIII-րդ դարու սկզբին։ Բնակիչները 80 տուն են. գիւղի ստորոտը կան մի քանի խաղողի այգիներ, որոնք քաղաքացիների են պատկանում գլխաւորապէս. քաղցրահամ և սառնորակ աղբիւրներ ունի։ Շուշանց հետի է քաղաքի այգեստաններից 4 մղոն։

Նոր-Գեղ.—Շուշանց գիւղի դէպի արեւլահարաւ համանուն կէտուկի ստորոտ ընկնում է Նոր-Գեղ հայաբնակ գիւղը 200 տուն հայ բնակիչներով. ունի մի եկեղեցի. գիւղի մէջ տեղից անցնում է մի յորդ առու որ լցուցանում է նոր-գեղացիների ջրի կարիքը։ Նոր-գեղացիք աշխոյժ աշխատասէր և ընդունակ ժողովուրդ են։

Բերդակ և Սեւակրակ գիւղերը ընկնում են ս. Խաչի սարի վրայ նոր գիւղից դէպի հարաւ-արեւմուտք. առաջինը շինուած է մի գեղեցիկ ձորակի բերան, 80 տուն բնակիչ ունի, եկեղեցի XVIII դարու վերջերին շինուած, և մի ուսումնարան եկեղեցու բակում։ Սրան մօտ է Սեակրակ գիւղը 50 տուն բնակիչներով։

Նուռուպաշ գիւղը տարածւում է Բերդակից հիւսիս, Վանայ դաշտի հարաւը եղբորդ բլրակի ստորոտը. աչքի է ընկ-

նում իր այգիներով (խաղողի), ջրերի առատութեամբ, ջրաղացներով և գեղեցիկ տեսարանով, քաղաքից հաղիւ 5 մղոն հեռաւորութեամբ գէպի նրա հարաւ-արեւելքը: 100 տուն հայ բնակիչ ունի, մի եկեղեցի յանուն ս. Ստեփաննոսի Նախավկային, եկեղեցու բակում ունի և գիւղական խղճուկ նախակրթարան ձմեռուայ եղանակի համար, ըստ որում միւս եղանակներին աշակերտները պարտաւորուած են լինում երկրագործ ծնողներին օգնել իրանց աշխատութիւնները մէջ:

Կենդանաց.—գիւղը գտնուում է Կուռուպաշից գէպի արեւմուտք 35-40 տուն հայ բնակիչներով և մի եկեղեցիով՝ ս. Ստեղծածին, որի Քօչահան կոչուած աւետարանին ուխտ են գնում բազմաթիւ ցաւագարներ, առաւելապէս յօղացաւ ունեցողները, այս գիւղին մերձ է մի մեծ քարահանք, որ տալիս է շինութեան և ջրաղացների յարմար քարեր:

Ծվոտան գիւղը Վանայ դաշտի հարաւ, ծայրում բլրակի կրճին, որ նայում է գէպի ծով նրանից երկու մղոն հեռաւորութեամբ, զարդարուած է պողատու մեծ այգիներով, 95 տուն հայ բնակիչ ունի այս գիւղը, մի եկեղեցի XIII դարու գործ, և գիւղակ. մի փոքրիկ ուսումնարան:

Արտամէղ գիւղաքաղաք Վանայ ծովակին հարաւ-արեւելեան ափին վրայ, Վան-Տոսպի ամենագեղեցիկ վայրերից մէկը գեղեցկագիր տեսարաններով, ծառազարդ հովանիներով հրապուրել է և մինչև այժմ էլ քաջում է գէպի իրան նրա տիրապետողներին՝ ծառայելով իբրև ամենայարմար ամարանոց նրանց համար իր բնական յարմարութիւններով: Մինչև իսկ Խորենացին կամեցել է որ իր հերոսներից շատերը սրա ընծայած հրապոյրները վայելեն անպատճառ, ըստ որում սրա մօտ լողանալիս կորցնում է և իր գիւթական «յուսութն ու յուլունքը» տափոտ դշխոյն Ապոքեստանի *), և Արտաշէս Արշակունին սրա հովանիների առանձնութեան մէջն է անցկայնում իր երջանիկ մեղրալուծին ընդ չքնաղաղեղ օրիորդին Ալանայ**): Այժմու մեղի տիրապետողներին էլ չէ զլանում այդ հինաւուրց Արտամէղը, բայց միշտ էլ նոր և գեղեցիկ, իր սքանչելի սիւքն ու դալարիքը՝ Նշանաւոր են թէ Վանում և թէ չըջակայքում համբաւուած և սիրելի սրա պտուղները, որոնցից Արտամիդու «գէլապի» խնձորին իր բանաստեղծական գոգարիկ տողերից մի քանիսը նուիրել է Հ. Գ. Արուստէսեանը ***)) արժա-

*) Մովս. Խոր. I. ԺԶ.

**) Թովմա Արծրունի. Կ. Պոլիս, 1852, եր. 53. 57.

***)) Մանանայ. Կ. Պոլիս. 1876, եր. 100:

Ժանապէս: Այժմ Արտամէդի տների թիւը հասնում է 500-ի է, որոնք Ոստան տանող մեծ պողոտայով բաժանուել են երկու մասի՝ ըստ բնակչութեան կազմելով թիւքրաց և հայոց թաղերը. հայերը ունին եկեղեցի: Բացի այս եկեղեցուց որ կանգուն է մնում և ուր Ժամասայութիւն է լինում՝ Արտամէդի մերձաւոր շրջականերում այստեղ և այնտեղ ցրուած կան բազմաթիւ եկեղեցիների և վանքերի մատուռների և սրբավայրերի անշուք մնացորդներ*), որոնք Արծրունեաց հարստութեան փառաւոր անցեալն են վերջուշում ականատեսի մտքին մէջ և զանազան տիւր և ուրախ խորհրդածութիւններէ մղում նրան: Այս գիւղերից զատ Վան-Տոսպի մնացեալ գիւղերից արժէ յիշատակել Կողպանց, 35 տուն հայ բնակչով, մի եկեղեցի առանց քահանայի, Տարման-Գիւղը, 45 տուն հայ բնակչով, մի փոքր եկեղեցի մի քահանայով, Ոսկեքակ 30 տուն հայ բնակչով, մի փոքր եկեղեցի և մի քահանայ, Զարանց, 40 տուն հայ, մի եկեղեցի և մի քահանայ, Սիւան, 60 տուն հայ բնակիչ, մի եկ. և մի քահանայ, Լամգկերտ, 30 տուն հայ բնակիչ, մի եկեղեցի և մի քահանայ, Նաքաթ, 35 տուն, մի եկեղեցի և մի քահանայ, Փառուղ, 30 տուն, մի եկեղեցի առանց քահանայի**): Այս մասի գիւղերը որոնք միմիանց մօտիկ հեռաւորութեամբ ցրուած են Վարազայ լեռան կրճերն և փէշերին վրայ, ունեն լաւ օդ, ջուր Վարազայ սարից բղխող պաղորակ և վճիտ, զուլալ աղբիւրներ, ոմանք էլ այգիներ և ծառազարդ վայրեր՝ մեծաւ մասամբ, ինչպէս երևում է, զուրկ են հողեր մխիթարութիւնից և կրթութեան միջոցներից, կազմելով յետ ընկած խաւար անկիւններ, տնտեսապէս էլ աղքատ և ողորմելի վիճակով:

ԿԱՐՍԵՑԻ

(Գը շարունակուի)

*) Ս. Գէորգ, Ս. Սարգիս, Ս. Ստեփանոս. Ս. Զմտոն և այլն:

**) Զրուանդանց, Զորավանց—չին Զորավանք հայաբնակ մեծ գիւղը և մեր մի քանի կաթողիկոսների աթոռանիստ, հայրապետանոցը—եւ մի քանի երբեմնի հայաբնակ գիւղերը այժմ մի քանի (2-3) տուն հայ բնակիչ ունին միայն: